

**Date – 11/01/2026**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. Home Minister Pu K. Sapdanga chuan ruihhlo ti thinte pawhin an tum tak tak a nih chuan an ngei thei tih a sawi.
2. Central YMA Road Monitoring Committee chuan Kawnpui-Serkhan-Durtlang kawng chu a tum hnihna atan an endik.
3. Mizoram Police-te chuan kum liamta January atanga October thla thleng khan BNS 2023 hnuaiah thubuai 2,039 an ziaklut.
4. Odisha-ah nimin chawhnu lam khan Sundargarh district-a Rourkela bulah thlawhtheihna mi 9 thut theihna chi chu a tla.

<><><>

### HOME MINISTER

Home Minister Pu K. Sapdanga chuan ruihhlo ti thinte pawhin an tum tak tak a nih chuan an ngei thei tih a sawi.

Minister hian nimin khan Operation Kingdom Ministry (OKM), Phunchawng a tlawh a, Annual Sports Closing 2026 Function a hman pui. Pu K. Sapdanga chuan, an sorkar tirh atangin Mizorama ruihhlo lut tam tam chu nasa taka an do theih dan tur an ngaihtuah tih a sawi a, hemi kawngah hian Excise Department nen tawngkawpin theihtawp an chhuah tih a sawi baw.

Home Minister chuan ruihhlo ngaite chungchang sawiin, Sorkar pawhin a tum lian ber chu nun kawng dik an zawh theihna tura dan kenkawh te, hrem ngai hrem te, siam that ngai siam that te a ni a ti a, OKM-a awm te chu anmahni nihna pawm a, damna duh a kalkhawm an ni chu fakawm a ti a. Sorkar pawh OKM tana an theih ang ang ti turin a inhawng a ni, a ti baw.

OKM Home-ah hian thawktu mi sawmli (40) vel leh zirlai mi zali (400) bawr an awm mek a ni. Khuallian hian Sports an neih zawh taka lawmman hrang hrang a sem nghal baw a ni.

<><><>

### CENTRAL YMA ROAD MONITORING COMMITTEE

Central YMA Road Monitoring Committee chuan nimin khan CYMA President Pu R. Lalngheta hoin Kawnpui-Serkhan-Durtlang kawng (KSD Road), BRTF hnuai contractor, BRN Infrastructures Private Limited-in an thawh mek chu a tum hnihna atan an endik.

CYMA Road Monitoring Committee hian hna thawh mek chu an duh khawp loh lai leh, hna chak zawka an thawh dan tur te an sawipui a. Contractor te pawhin tha zawk leh chak zawka thawh an tum thu an lo hrilh a ni.

Kawng siamna hmunah hian CYMA Team te hian, Alkatra (bitumen) mix sat zâwng (temperature) pawh an endik nghal a. Endikna aţangin temperature chu degree centigrade 142 lai a sa a tlin avangin lâwmawm an ti a. Amaherawhchu, thlasik khaw vâwt hnuaiia kawng chhuata an chap darh chhûngin, temperature hi a tlâk hniam chak êm avângin, a theih chin chinah chak zâwk leh rang zawka khâwl hmanga a chap darh hna hi thawk tûrin, BRTF leh Contractor te hi an hrilh zui nghal a ni.

CYMA Road Monitoring Committee hian Sairang to Vairengte Kawng siam mêk pawh an endik nghal a. Helai kawng hi NHIDCL hnuaiia company hrang hrangte thawh a ni a. Company-te hian an harsatna te lo thlenin, CYMA hruaitute hian a theih dan ang angin hma an lakpui zui nghal a. Sorkar thuneitute pawh biaksak nghalin, Company lam pawh an lawm hle a, phur tak chung leh chak zawka hmalak an tum thu an sawi ve bawk a ni.

Kawng siamtu Contractor hrang hrangte hi, CYMA hruaitute chuan furpui lo thlen hma ngeia an hnate thawk zo ngei tûrin an hrilh a ni.

Nikum, December ni 16-a kawng siam hna an endikna leh, chak zâwka hna thawk tûra CYMA ngenna chuan awmzia a nei hle tih an hmu a. Hnathawhna hmanrua leh khawlte pawh an lo in chhawp kim viau tawh tih an hmuhin, lawmawm an ti hle bawk a. Contractor la inpeih fel chiah lote pawhin, kumin January ni 13 aţang chuan an khawl bun thar te pawh an hman theih tawh tûr thu sawiin, a chak thei ang bera hna an thawh nghâl tûr thu, CYMA Team te hi an hrilh bawk a ni.



## POLICE RECORD

Mizoram Police-te chuan kum liamta January atanga October thla thleng khan BNS 2023 hnuaiiah thubuai 2,039 an ziaklut a; kum 2021 atanga chhiarin nikum October thla thleng khan Mizoram Police hian BNS/IPC hnuaiiah thubuai 13,188 an ziaklut tawh a; rûkrûk leh inrawkna thubuai a tam ber.

Nikum January - October thla 10 chhung khan Mizoram Police hian BNS 2023 hnuaiiah thubuai 2,039 an zia lut a, thubuai an ziah luh zingah hian mi rawk thubuai 914 awmin a tam ber a ni.

Mizoram Police-in nikum chhunga BNS 2023 hnuaiia thubuai an ziah luh tawh zat an tarlan chinah hian rûkrûk thubuai 614 awm bawkin, mi kutthlak thubuai 73-te, tualthah thubuai 17 te, pawngsual thubuai 26 leh inbumna thubuai 53-te chu a langzar zual an ni.

Kum 2021 atanga chhiara nikum October thla (kum 4 leh thla 10) chhung khan Mizoram Police-te hian BNS (tunhma chuan IPC) hnuaiiah thubuai 13,118 an ziaklut a; heng zinga thubuai 5,166 hi rûkrûk thubuai niin a tam ber a, thubuai ziah luh zawng zawng atangin za zela 39 point 38 a tling. Rûkrûk thubuai hi mi rawk thubuai 4,773-in dawtin, inbumna thubuai 640 leh mi kutthlak thubuai 444-te chu a tam zual an ni bawk.

Kum 4 leh thla 10 chhung vek hian Mizoram Police-te hian tualthah thubuai 121, pawngsual thubuai 112, tualthah tumna thubuai 84 leh pawisa lem kaihhnawih thubuai 20 ziaklutin, heng thubuaite hi a langsar zual an ni.

**VOICE CAST - Nikum 2025 January atanga October thla chhung vek khan Mizoram Police-te hian Special & Local Law hnuaiah thubuai 709 an ziaklus baw a; chungte chu ruihhlo kaihnawih (ND&PS Act) hnuaiah thubuai 267 ziaklus niin a tam ber a; naupang chunga hleilenna kaihnawih (POCSO Act) hnuaiah thubuai 126 ziaklusin dawtin, zu khapna dan (MLP Act) hnuaiah thubuai 183, ralthuam kaihnawih (Arms Act) hnuaiah thubuai 31, puakthei thil dang kaihnawih (Explosive Substances Act) hnuaiah thubuai 27, Information & Technology Act hnuaiah thubuai 7 ziaklus a nih bakah hian Special & Local Law kaihnawih thubuai dang 68 an ziaklus baw a ni. Special & Local Law hnuaiah hian kum 2024 January - October thla chhung vek khan thubuai 736 ziaklus a ni a; nikum thla 10 chhunga thubuai ziaklus aiin kum hmasa thla 10 chhunga thubuai ziaklus zat hi 27-in a tlem zawk a ni)**

<><><>

#### **AIR NEWS ON SOCIAL MEDIA**

**Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinthar puan leh a ni ang.**

<><><>

#### **CYMA**

**Nimin chhun khan Phaikhou, Damcherra, Tripura-ah Young Chorei Association (YCA) buatsaih Khambar Kut chu Central YMA General Secretary Prof. Malsawmliana leh hruaitu dang ten an hman pui.**

**Khambar Kut hi kumtin in January ni 9-11 ah YCA hian an hmang thin a. Kumina Kut hmannaah hian Prof. Malsawmliana chuan, Zofaten Kut chi hrang hrang an nei tih sawiin a, chung zingah chuan pawimawh bik leh pawimawh lo bik a awm lo a. Mipuiin an hlut bik leh mipui nawlpui huap lo Kut te erawh a awm thung a ti a. Heng Kut te hi hnam inpumkhatna atan te, nunphung leh tihdan hlui chhawm nun zelna atan te, nihna (identity) humhalhnan te an tangkai tih a sawi bawk.**

**Prof. Malsawmliana hian Chorei tawng leh nunphung te pawh a dal zel lohna turin theihtawp chhuah zel tur leh inchimralna laka inveng zel turin a chah a. Chorei mipui ten harsatna an tawh leh thil danga puih ngaihna a awm chuan Central YMA a inhawng reng a ti bawk.**

**Khambar Kut hmannaah hian Central YMA General Secretary bakah CEC 7 te, Taitesena Group YMA President leh Secretary te an tel bawk.**

<><><>

#### **HLAKUNGPUI MUAL**

**Mizo thu ziaklus mi leh hla phuah thiam thlanchhuah bikte hriatrengna lungphun Hlakungpui Mual chu kum kalta 2025 chhung khan mi 6,915-in an tlawh a; kumin April thla khian Hla Kungpui Mualah hian Mizo thu ziaklus mi 4 leh hla phuah thiam mi 2 sengluh belh an ni dawn.**

**Champhai District chhung Khawbung khuaa Hla Kungpui Mual hi kum 1986 khan Mizo hlaphuah thiam Patea leh Damhauva te hriatrengna lungphun a bultan niin, kum 10 dan zelah thu leh hla lama thawhhlawk boral tawh zinga**

thlan chhuah bikte chu a ni bi kima an thih ni atanga kum 5 tling chinte sengluh thin an ni.

Tunah hian Hla Kungpui Mualah hian thu ziak mi 15 leh hla phuah thiam mi 21 hriatrengna lung phun a ni tawh a; kumin April ni 8 leh ni 9 khian Mizo zinga thu ziak mi pali - Capt. LZ Sailo, Rev. Zairema, Khawlkungi leh Lalhmingliana Saiawi bakah hla phuah thiam pahnih - Hrawva leh Lalmama te chu Hla Kungpui Mualah hian seng luh an ni dawn.

Hla Kungpui Mual hi puitling tan luh man Rs. 20 a ni a; kum kalta 2025 chhung khan Hla Kungpui Mual hian tlawhtu mi 6,915 neiin, an zinga mi 11 hi ramdang mi (foreigner) an ni a, India ram state dang mi 16 an awm bawk.

<><><>

#### PLANE CRASH IN ODISHA

Odisha-ah nimin chawhnu lam khan Sundargarh district-a Rourkela bulah thlawhtheihna mi 9 thut theihna chi chu a tla thla. Thi leh hliam tuar awm lo mah se, a chuang mi paruk: passenger pali leh crew member pahnih te chuan hliam an tuar vek a ni. IndiaOne Air thlawhtheihna hi Bhubaneswar atanga Rourkela pana thlawk a ni.

Pilot chuan a thlawh laiin thlawhtheihnaah hian diklo a awm nia hriain 'Mayday' a call thu a sawi a, hemi hnu hian thlawhtheihna hi passenger-te chhanchhuah tumin hnim awmna lam grasslands ah a tum tir a ni. Hliam tuar zawng zawngte chu Rourkela Sawrkar Damdawi In panpui vek an ni a. Directorate General of Civil Aviation (DGCA) leh Aircraft Accident Investigation Bureau (AAIB) team-te chuan chhui chian lehzual turin chetsualna hmun hi an enfiah dawn a. Odisha Chief Minister Mohan Charan Majhi chuan hliam tuarte uluk taka enkawl an nih theih nan hmalak anih thu a sawi.

<><><>